

中国名山志



中国文献珍本丛书

中国名山志 (四)

全国图书馆文献缩微复制中心



重修衡岳志序

蓋余於衡岳有宿緣焉余羅浮山下人也史稱羅浮為南岳佐命而九僊云衡岳水簾洞與羅浮通羅浮號朱明洞天舊矣而朱明峯亦在衡岳此兩山者

實有瓜葛余所謂宿緣者徵是
也余昔讀書捐僊樓與羅浮水
簾相對匹練霏霏落筆格余
灑以浮提之汁時化作五色鳥
飛太因思洞中僊躋暗達朱陵
風為馬神為御豈更駕哉每興

到躡飛雲拍玉女肩輒遙獻祝
融君一杯酒曰訂盟無寒余神
往來於衡岳者踰廿年宦海浮
沉幾負尚平志矣然余不忘岳
岳而不鄙夷余若有作其合者
余由南垣出臬楚時病暍服餌

野寺已誓唾雞肋而煮萁絲白
門諸詞客過慰籍蹤余肘曰湖
南不惡祝融君在焉此不足為
居停主邸域中五大是據其一
丈夫筋力健不自騰蹕垂老乃
向臥遊圖討風景何沒沒也余

登然起曰賴有此君病劇幾忘
之汗簌簌下疾良已余是以有
浮湘之興則僮然余者岳也余
則何以報岳靈余通籍凡三仕
矣皆占湖山吳門白下不乏名
勝至今益廓而大如顧長康啖

麓漸入佳境余則何以報岳靈
且余所取大者甘泉白沙兩先
生蓋吾鄉之望也白沙老病欲
遊衡岳而未逮甘泉大耋一再
至計杖屨而躋蹻矣小子不敏
得及壯而遊尚饒濟勝具有天

幸焉余則何以報岳靈遊當夏
之夜雲垂垂欲雨山僧勸且需
余謂欲觀海日決宵征乃賈勇
而上俄頃四天澄明祥飈不驚
珠星璧月伸手可掇夫開雲霧
雪久艷人口余偶然而遇孰為

為之余則何以報岳靈鄉者歲
之不登也瘡痍未起民且狼顧
今銷癘澹菑雨暘若禾稌豐蓋
岳實開石廩以粒吾民也余始
得與民偕樂于遊于觀則又何
以報岳靈夫岳坐離明平衡元

化秩視三公古天子所時巡而
加禮者也楚泱泱大國茲為重
鎮夫國且有史岳可無志乎重
志所以尊岳實余司巡者責也
夫徵文考獻績往鑑來俾靈蹟
昭宣勿墜勿穢所用報岳靈無

先於此者舊固有志已漫漶刻
敝不可諦視魯魚襲訛掛漏滋
多博處傷蕪約處傷缺岳靈慙
焉殆有意於余而授之簡乎先
是曾金簡先生壯歲拂衣久栖
衡岳素留心於此道蒐羅攷校

函帙既富廊生祖詩弓得其秘
藏生讀書岳中者有年益漁獵
所未備余官有餘閒鈴閣晝靜
因字擲而句讐之間出已見僭
加繩削大都視舊志蕪者去什
之三缺者補什之五至於訂疑

似析同異斤斤彬彬期足徵信
而罔墮於荒唐穢雜則郡邑諸
大夫及兩王生邊寧國秦劉生
經筵袁生伯璫相與彈力商確
始成完書蓋聚衆白以成裘非
余管見所敢擅也編成授梓余

獨捐俸竣其事毋煩郡邑諸大夫
蓋余神交者廿餘年而始獲
此遊遊而欲報岳靈者五而今
了此願岳靈聞之而後喜可知
也雖然未既羅浮固岳之佐命
而岱恒嵩華六岳之蘭昆玉季

也余假羅浮為紹介得奉筆札
之後岳靈其轉而紹介彼四君
當次第曳裾其巔余穎雖禿尚
堪為四君作董馬其間余靳余
且宿春糧矣

皆

萬曆四十年壬子清明日

欽差整飭郴桂衡永兵備分巡

上湖南道湖廣按察司僉事

粵東莞鄧雲霄撰于天籟亭